

Siunnersuisoqarfimmik inunnik akiitsoqartunik siunnersuisinnaasumik ikiuisinnaasumillu pilersitsinissamut periarfissat pillugit nalunaarusiornissaq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Siunertaasussaq tassaavoq akiitsut annikillisarniarlugit immikkut ilisimasallit ikiortigalugit akiitsoqartunik akeqanngitsumik siunnersuisarnissaq. Nalunaarummi taamatut siunnersuisoqarfimmi suliassat suuneri aammalu immikkut ilisimasallit tassunga iluaqutigineqarsinnaanersut nassuiarneqassapput, kiisalu taamatut siunnersuisoqarfiliorerup ingerlanneqarnera Landskarsimut qanoq ukiumut akeqarumaarnersoq. Nalunaarusiaq 2016-imi ukiakkut ataatsimiinnissaq sioqqullugu naammassereerneqarsimassaaq
(Inatsisartunut ilaasortaq Naaja Nathanielsen, Inuit Ataqatigiit)

pillugu

Aningaasaqarnermut Akileraartarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Aningaasaqarnermut Akileraartarnermullu Ataatsimiititaliaq suliarinninnermini ukuninga inuttaqarpoq:

Inatsisartunut ilaasortaq Jens Immanuel (Siumut) siulittaasoq
Inatsisartunut ilaasortaq Steen Lynge (Atassut) siulittaasup tullia
Inatsisartunut ilaasortaq Jess Svane (Siumut)
Inatsisartunut ilaasortaq Tillie Martinussen (Demokraatit)
Inatsisartunut ilaasortaq Naaja H. Nathanielsen (Inuit Ataqatigiit)
Inatsisartunut ilaasortaq Sara Olsvig (Inuit Ataqatigiit)
Inatsisartunut ilaasortaq Peter Olsen (Inuit Ataqatigiit)

UKA 15-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Siunnersuuteqartup paasissutissiissutigaa taama annertutigisumik akiitsoqarnek innuttaasunut pisortanullu attackuminaatsuusoq aammalu inatsisiliortut aqqissuussinissap Ilangaasivimik taaguuserneqarsimasup naammassineqarnissaa atuutilernissaalu utaqqiinnarsinnaanngikkaat.

Siunnersuuteqartoq isumaqarpoq nalinginnaasumik ilisimaneqartoq sippuilluni akiitsoqalersimaneq ataavartumik piitsuunissamut inuaqatigiillu killinganni inuulernerumut pissutaa-

sartuq. Akiitsoqarnek assigiinngitsorpassuarnik pissuteqarsinnaasarpoq. Assersuutigalugu sivuumik suliffeqannginneq, isertitat appasinneri, ulluinnarni pisariaqartitanut missingersuusionermit ajornartorsiuteqarnerit kiisalu naafferartumik akiligassaagaluartunik atornerluinerit. Tamakku pissutigalugit pinaveersaartitsinermit ikiusinnaanermilu sakkussat pisariaqartinneqartut siunnersuuteqartoq isumaqarpoq.

Innuttaasunut akiligassaqartunut imaluunniit annertuumik akiitsoqalersimasunut akiitsullu annertusannginnissaannik qanoq iliuuseqarsinnaanermut, taamatullu akiitsorilersinnaasanik pinaveersaartitsinissat pillugit siunnersuisoqarfimmik pilersitsineq imminut akilersinnaasasooq siunnersuuteqartup qularinngilaa.

2. Ataatsimiititaliap siunnersuummik suliarinninnera

Siunnersuummik siullermeerinninnermit siunnersuut nalinginnaasumik taparserneqartoq ataatsimiititaliamit maluginiarneqarpoq.

Pisortanut akiitsut taama amerlatigilersimanerat ajornartorsiutaasutut ataatsimiititaliamit isigineqarpoq. Ataatsimiititaliattaq paasinninnera malillugu akiitsut ikilisinneqarnissaat pisariaqartinneqartutut Inatsisartunit isumaqarfineqarpoq. Ataatsimiititaliap paasinninnera malillugu akiitsut ikilisinniarlugit pinaveersaartitsiniarlunilu iliuusissanik aallartitsisoqarnissaa kissaatigineqarpoq.

Tamatuma saniatigut siullermeerinninnermit isumaqatigiinniarnermi ataatsimiititaliamit paasineqarpoq pisortanut taama amerlatigisunik akiitsoqalersimaneq allanik ajornartorsiuteqarnermut ersiutaasutut isigineqartariaqartoq. Siunnersuuteqartullumi nammineq oqaatigaa pissutaasut assigiinngitsorpassuusinnaasut. Ilaatigut tamatumunnga pissutaasinnaapput sivuumik suliffeqannginneq, isertitat appasinneri, ulluinnarni pisariaqartitanut missingersuusionermit ajornartorsiuteqarnerit kiisalu naafferartumik akiligassaagaluartunik atornerluinerit. Ataatsimiititaliap isumaa malillugu akiitsumik ikilissarnissaannut innuttaasut ikiorneqarnissaat naammangilaq. Inatsisartuni oqallinneq ataatsimiititaliamit ima paasineqarpoq akiitsunut tunngasumik pisussaaffiit aquneqarsinnaanissaasa piorsarsimassutsimut ilaatinneqarnissaa assorsuaq pisariaqartinneqarpoq.

Siunnersuuteqartup oqaatigaa nalinginnaasumik ilisimaneqartoq sippuilluni akiitsoqalersimaneq ataavartumik piitsuunissamut inuaqatigiillu killinganni inuulernermit pissutaasartoq. Tassunga atatillugu akiitsut tamakkiisumik isumakkeerinnissutigineqarsinnaanerannut periarfissaq aamma isummerfigineqartariaqartoq ataatsimiititaliaq isumaqarpoq. Nassuiaatip siunnersuutigineqartup suliarineqarnissaanut atatillugu apeqqutip tamatuma qaqinneqarnissaa naleqquttuusaaq.

3. Siunnersuutip aningaasatigut kingunerisassai

Naalakkersuisut naliliinerannit allannerusumik naliliinissamut ataatsimiititaliaq tunngavissaqarsorinngilaq.


4. Ataatsimiititaliap inassuteqaatai

Tamanna tunngavigalugu allannguutissatut siunnersuut una ataatsimiititaliamit isumaqatigiittumit saqqummiunneqarpoq:

Siunnersuisoqarfimmik inunnik akiitsoqartunik siunnersuisinnaasumik ikiuisinnaasumillu pilersitsinissamut periarfissat pillugit nalunaarusiornissaq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Siuntertaasussaq tassaavoq akiitsut akilerneqarnissaat siunertaralugu immikkut ilisimasallit ikiortigalugit akiitsoqartunik akeqanngitsumik siunnersuisarnissaq.

Siunertaq aamma tassaasinnaavoq assersuutigalugu aningaasaqarnermik aqutsinissamut ilinniartinneqarnissamik neqerooruteqarnikkut pinaveersaartitsinissap sulissutigineqarnera kiisalu tamatuma nassatarisinnaallugu akiitsut utertinneqarsinnaaneratt piviusersiunngippat taakkuninnga isumakkeerinninnissaq anguniarlugu immikkut suliniuteqarneq. Siunertamut aamma ilaasinnaavoq. Nalunaarummi taamatut siunnersuisoqarfimmi suliasat suuneri aammalu immikkut ilisimasallit tassunga iluaqutigineqarsinnaanersut nassuiarneqassapput, kiisalu taamatut siunnersuisoqarfiliornerep ingerlanneqarnera Landskarsimut qanoq ukiumut akeqarumaarnersoq. Nalunaarusiaq 2016-imi ukiakkut ataatsimiinnissaq sioqqullugu naammassereerneqarsimassaaq.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.




Jens Immanuelson,
siulittaasoq



Steen Lynge



Jess Svane



Tillie Martinussen



Naaja Nathanielsen



Sara Olsvig



Peter P. Olsen